



# Komunikado

27 di yüni 2018

## **Raymond Gradus (Cft): "Enfoke di Sint Maarten mester ta pa pone e ekonomia bèk riba pia, traha pa balansá e presupuesto i yega na sosten di likides"**

**Philipsburg – Kolegio di supervishon finansiero (Cft) a bishitá Sint Maarten di 25 pa 27 di yüni. Durante e bishita aki Cft a enfatisá e importansia di traha pa yega den un futuro serkano na un presupuesto balansá. Pa 2018 sinembargo un sosten di likides lo ta nesario riba un término kòrtiku. Otro tópikonan di kòmbersashon tabata e nesidat di mehorá e maneho finansiero, solushoná e problemanan kontínuo di IT i optené asistensia tékniko.**

Na Sint Maarten Cft a bishitá Gobernador, Minister di Finansa, Konseho di Minister i e komishon finansiero di Parlamento. Cft a hiba kòmbersashon ku vários stakeholder manera SZV, Servisio di Impuesto, Kontrolaria General, e miembro di e Grupo di Guia (Steering Committee) na nòmber di Sint Maarten i e partidonan ku ta envolví den e rekonstrukshon.

Pa loke ta trata e presupuesto di 2018, Cft a bolbe ekspresá su preokupashon tokante e posishon prekario di likides i e défisit presupuestario aktual. Raymond Gradus (Cft): "Apesar di e situashon difísil, ta importante pa tuma medida pa mas lihé posibel yega bèk na un presupuesto balansá." Den e kuadro aki Cft ta referí na su punto di bista ku Sint Maarten mester limitá e défisit presupuestario mas tantu posibel. Medidanan pa redusí gastu, amplia e base di impuesto i mehorá pagamentu di impuesto (compliance) ta di suma importansia pa por logra realisá e meta aki. Den kòmbersashon ku Cft SZV a kompartí e eksperiensia ku e tin ku mehoramentu di compliance. A korto plaso Sint Maarten ta bai tin mester di likides adishonal pa por kumpli ku su kompromisonan, i den e kuadro aki a entregá un petishon na Konseho di Minister di Reino. E retonan ku Sint Maarten ta konfrontá aktualmente riba tereno di finansa públiko a keda tratá ampliamente ku e Minister di Finansa ku a kaba di sinta, i el a elaborá riba su ambishonnan pa e próksimo añanan.

Sint Maarten a hasi esfuerso importante pa por a entregá e diferente dokumentunan relashoná ku e presupuesto den e último lunanan. No solamente finalmente Gobernador a firma e presupuesto, pero e di dos reportahe di mitar aña di 2017 i i reportahe di e promé kuartal di 2018 tambe a keda entregá na Cft. Ounke a entregá mayoria di e dokumentonan despues di e fecha akordá, Sint Maarten a mehorá si su esfuersonan pa kumpli ku e deadlinenan. E kuentana anual di 2013 pa 2016 sí ainda no a keda entregá.

Ounke Sint Maarten a logra redusí e retraso den e reportahenan finansiero, e maneho finansiero ta keda insuficiente i e problemanan di IT ta kontinuá. Cft a enfatisá e importansia di asistensia tékniko den e kuadro aki, ya komo ku riba su mes Sint Maarten no a logra mehorá e maneho finansiero ni no por a solushoná e problemanan di IT. Cft a risibí informashon ku en berdat Sint Maarten ta trahando pa haña kapasidat èkstra pa atendé ku e problemanan, pero e meta aki ainda mester keda realisá. E nesidat pa mehorá e siklo presupuestario ta bira mas importante pa por mehorá e kalidat di e reportahenan i di e forma ei supstansia e nesidat di likides pa 2018. Cft i gobièrnu a papia tokante e prosedura di kada tres luna di hasimentu di kuenta pa loke ta trata likides. Un prosedura asina ei tin komo benefisio ku por inkluí den dje informashon nobo tokante di entrada i gastu. Reportahenan mensual di entrada i gastu ta hasi posibel tambe ku por evaluá e posishon di likides i e défisit antispá.

E manera ku e ekonomia di Sint Maarten ta rekuperando ta di vital importansia. Cft ta kontentu di por a risibí e vershon definitivo di e Plan Nashonal di Rekuperashon i Revitalisashon, den kual ta indiká e loke ta nesario pa por yega na rekuperashon i den kual tambe ta presentá un kuadro di implementashon di e plan di rekuperashon. Ta di gran importansia pa stimulá kresementu ekonómiko di Sint Maarten pa medio di esfuersonan riba tereno di rekuperashon. Stagnashon di e esfuersonan riba tereno di rekuperashon lo por tin un impakto negativo riba e kresementu ekonómiko i lo por resultá den tardansa di e proseso pa logra un presupuesto balansá. Rekuperashon i prinsipalmente rekonstrukshon di e aeropuerto no ta solamente di importansia pa Sint Maarten, pero tambe pa Sint Eustatius i Saba, konsiderando ku Sint Maarten ta fungi komo un puerto di transborde ('hub') importante pa e islanan aki.



E bishita aki na gobièrnu ta marka tambe despedida di e koleganan Sybilla Dekker i Maria Plantz. Sybilla Dekker ta retirá entrante di 1 di yùli di e aña aki; e ta miembro di Cft for di verano di 2012. Sybilla Dekker tokante di su periodo den Cft: "Esaki ta mi di dos bishita despues di pasada di e orkannan. Mi ta konsiente di e retonan enorme ku ta nos dilanti, i e forsa di revitalisashon di e pueblo di Sint Maarten ta keda impreshoná mi". Pa Maria Plantz tambe ta e delaster bishita, ya ku entrante 1 di òktober el a keda nombrá komo miembro di Raad van State pa Sint Maarten. Entrante 1 di yùli 2018 Cft ta konsistí di Raymond Gradus (presidente), Gregory Damoen (Kòrsou) i Henk Kamp (Hulanda). E susesor pa Sint Maarten lo bira konosí pronto.

[Fin di Komunikado]

**Fotógrafa:**

Edgardo Lynch

**Teksto pa foto:**

Presidente di Cft Raymond Gradus: "Pone e ekonomia bèk riba pia, traha pa balansá e presupuesto i yega na sosten di likides mester ta enfoka di Sint Maarten".

**Nota pa redakshon- no pa publikashon**

Persona di kontakto na Cft:

Sekretariado Kolegio di supervishon finansiero

Manus Twisk- Sekretario

Telefon (+5999) 461-9081 / (+5999) 461-9082 / (+5999) 461-9084

Email info@cft.cw

Internet www.cft.cw

Persona di kontakto pa Prensa:

Jefka Martina

Telefon (+5999) 512-6861